

Uunga siunnersuut: Avatangiisinut Aningaasaateqarfik pillugu Inatsisartut inatsisaat nr. xx, xx. xxx 2018-imeersaq

Kapitali 1

Avatangiisinut aningaasaateqarfiup siunertaa suliassaalu

§ 1. Avatangiisinut Aningaasaateqarfimmik, missingersuusiornikkut naatsorsuutitigullu teknikkkut aningaasaateqarfiusussamik, aningaasanullu inatsimmi immikkoortumik kontoqartussamik, pilersitsisoqassaaq.

Imm. 2. Avatangiisinut Aningaasaateqarfiup siunertaraa, inuiaqatigiit iluanni piujuartitsisumik ineriartorneq nukittorsarneqassasoq, inuup inuunerani atugassarititaasut ataqqillugit, uumasut naasoqarnerlu atajuarsinnaaqqullugit, suliassaqarfiit § 2-mi eqqartorneqartut eqqarsaatigalugit.

Imm. 3. Avatangiisinut aningaasaateqarfimmi aningaasaatissat makkuninnga pissarsiarineqassapput:

- 1) Avatangiisinut akitsuutinit il.il., nioqqutissat suliannilluunniit avatangiisinut immikkut nanertuutaasinnaasutut nalilerneqarsimasut akitsuusersorneqarnerinit isertitat.
- 2) Avatangiisinut akitsuutit aalajangersimasumik pissusilersortalernissamut siursaanissamik siunertaqartut.
- 3) Nunap Karsianit aningaasaliissutit.

§ 2. Avatangiisinut aningaasaateqarfiup isertitai avatangiisinut pitsanngorsaatissatut suliniutinut aningaasaateqarfiullu siunertaata iluani ingerlatanut atorneqassapput.

Tapiisoqarsinnaavoq imatut ilusilimmik:

- 1) Suliassaqarfiup imalt. ingerlatassap avatangiisit pillugit akitsuuserneqarsimasup iluani nalinginnaasumik avatangiisinut pitsanngorsaanissaq siunertaralugu suliniutinut.
- 2) Avatangiisini nanertuinnginnerunissaq qulakkeerniarlugu atuisut akornanni akitsuuserneqarsimasut aalajangersimasumik pissusilersortarnissaat anguniarlugu.

Imm. 2. Avatangiisinut aningaasaateqarfiup aningaasaatai ingerlatassanut, suliassanut makkununnga tungassuteqartunut atorneqarsinnaapput:

- 1) Ikuallaaviit eqqagassanillu isumaginnittarnerit pilersinneqarnissaannut imaluunniit nutarternissaannut.
- 2) Anartarfilerisarfinnik pilersitsineq imaluunniit nutarterineq.
- 3) Eqqakkanik inissiisarfinnik nakkutigisaasunik pilersitsineq.
- 4) Qamutunik motoorilinnik atorsinnaajunnaartunik passussineq, ilanngullugu isaterineq imaluunniit atoqqineq.
- 5) Suliffeqarfiit, sullissiviit, inissiat imalt. asimi eqqakkanik passussineq.
- 6) Angallatinik qimatanik passussineq.
- 7) Aalisakkanut qassutunik igitanik allanillu imaani eqqakkanik passussineq.
- 8) Aalisartarfinnik piniariartarfinnillu eqqiluitsuutitsineq.

9) Suliassat, innuttaasut aamma suliffeqarfiit isumalluutiniq eqqumaffiginninnissaannut ajornarunnarsitsisussat imaluunniit ajornannginnerulersitsisussat.

Imm. 3. Inuussutissarsiorlutik suliffeqarfinnut avatangiisitigut imalt. inuussutissarsiorluttut ingerlattanut unammilleqatigiinnermik equititsisuusinnaasunut tapiissuteqartoqarsinnaanngilaq.

§ 3. Avatangiisinut aningaasaateqarfiup suliagarnera, ingerlattanut aatsitassat pillugit ingerlatalu tamatumunnga pingaarutillit pillugit inatsisartut inatsisaanni pineqartunut ilaasunut, atuutinngilaq.

§ 4. Avatangiisinut akitsuutitut inatsisinit isertitat, takuuk § 1, imm. 3, nr. 1 aamma 2, akitsuummumut inatsimmi allasimappat, taanna avatangiisinut akitsuutitut inatsisaasussatut siunertaqartoq, aammalu isertitat Nunap karsianut tutsinneqassasut akitsuummumut inatsimmi pineqartumi tassani aalajangersimasumik aalajangersarneqarsimanngippat, siunertanut § 2-imi allasimasunut matussutissatut Avatangiisinut aningaasaateqarfimmut tutsinneqassapput.

Kapitali 2

Avatangiisinut aningaasaateqarfiup aqunneqarnera aamma allaffissornikkut aqutsineq

§ 5. Avatangiisinut aningaasaateqarfiup allaffissornikkut aqunneqarnera, Naalakkersuisut Siulittaasuanit isumagineqarpoq.

Imm. 2. Naalakkersuisut Avatangiisinut aningaasaateqarfiup suliagarnera pillugu nalunaarummik tamanut ukiut tamaasa saqqummiisassapput. Aningaasaateqarfiup naatsorsuutai Nunap Karsiata naatsorsuutaasa kukkunerisiorneqarnerannut ilaatillugu kukkunerisiorneqartassapput.

Imm. 3. Naalakkersuisut Avatangiisinut aningaasaateqarfimmi tapersiissutiniq tunniussisarneq aammalu aningaasaateqarfiup allaffissornikkut aqunneqarnera pillugit maleruagassanik erseqqinnerusunik aalajangersaasinnaapput.

Kapitali 3

Aalajangersakkat inaarutaasut

§ 6. Inatsisartut inatsisaat manna ulloq 1. januar 2019 atuutilerpoq.

Namminersorlutik Oqartussat, ulloq xx. xx. 2018

Kim Kielsen